

ॐ

कविवर श्री टेकचन्दजी कृत

श्री दशलक्षण मण्डलविधान

(जोगीरासा)

नेमीनाथो, दे तो साथो^१, भव भव और न चाहूं ।
भक्ति तिहारी, निशिदिन मन वच, काय लाय करि लाऊं ॥
धर्म कह्यो तुम, वानी दश विध, सो मोहि होउ सहाई ।
करुणासागर, समरस गर्भित, शीश नमों थुति गाई ॥१॥

(गीता छन्द)

धर्म के दश कहे लक्षण, तिन थकी जिय सुख लहै ।
भवरोग को यह महा औषधि, मरण जामन दुख दहै ॥
यह विरत नीका मीत जीका^१, करौ आदरतैं सही ।
मैं जजौं दशविध धर्मके अंग, तासु फल है शिवमही ॥२॥

(पद्मि छन्द)

यह धर्म भवोदधि नाव जान, या सेयें भव दुख होइ हान ।
यह धर्म कल्पतरु सुखपूर, मैं पूजौं भव दुख करन दूर ॥३॥

(गीता छन्द)

यह विरत मन कपि गले माहीं, सांकली सम जानिये ।
गज अक्ष जीतन सिंह जैसो, मोहतम रवि मानिये ॥

सुरथान माहीं विरत नाहीं, मनुज हू शुभ कुल लहै ।
तातैं सु अवसर है भलो, अब करौ पूजा धुनि कहै ॥४॥

(वेसरी छन्द)

जाने दशलक्षण व्रत कीना, ते सतपुरुषनिमें परवीना ।
भवसागर फिरनौ मिटि जावै, जो नर दशलक्षण वृष भावै ॥५॥

(भुजंगप्रयात छन्द)

यही धर्म सारं करै पाप क्षारं, यही धर्म सारं करै सुख अपारं ।
यही धर्म धीराहरै लोक पीरा, यही धर्म मीरा करै लोक तीरा ॥६॥

(त्रिभंगी छन्द)

यह धर्म हमारा, सब जग प्यारा, जगत उधारा हितदानी ।
यह दशविध गाया, जन मन भाया, उच्च बताया जिनवानी ॥
यह शिव करतारा, अघतैं न्यारा, भवि उद्धारा मुनि धारा ।
ताको मैं ध्याऊँ, शीश नवाऊँ, अर्ध चढाऊँ सुखकारा ॥७॥

(चौपाई छन्द)

या व्रतकी महिमा कहा वीर, दशविध धर्म हरै भवपीर ।
इसी धर्म विन जग भरमाय, जजहु धरम अति दुरलभ पाय ॥८॥

(दोहा)

दश प्रकारको धर्म यह, दशविध सुतरु जान ।
वांछित पद सेवक लहैं, अधिक कहा सुखदान ॥९॥

सोरठा--धर्म हमारा नाथ, धर्म जगतका सेहरा ।
भव भवमें हो साथ, और न वांछा मनविषैं ॥१०॥

मण्डलमध्ये परिपुष्पांजलि क्षिपेत् ।

समुच्चय पूजा

(त्रिभंगी छन्द)

यह धर्म क्षमावा मान गुमावा, सरल सुभावा सतिवानी ।
शुचि भाव करावा संजम लावा, तप करवावा अधिकानी ॥
शुचि त्याग बतावै नगन पुजावै, शील बड़ावै शिवदाई ।
यह धर्म हमारा थाप करारा, पूजन धारा सिरनाई ॥१॥

ॐ ह्रीं श्री दशलक्षणधर्म ! अत्र अवतर अवतर संवौषट् ! अत्र
तिष्ठ तिष्ठ ठः ठः । अत्र मम सतिहितो भव भव वषट् ।

(मणुयणाणंदकी चाल)

क्षीरसागर तना नीर शुभ लाइये ।
कनक झारी विषै धार गुण गाइये ॥
मरण उतपति नहीं होय ता फल सही ।
जानि इमि धर्म दशधा जजौं शिवमही ॥१॥

ॐ ह्रीं श्री दशलक्षणधर्मेभ्यो जन्मजरामृत्युविनाशनाय जलं
निर्वपामीति स्वाहा ।

नीर संग अगुरु चन्दन सु घिस लायजी ।
सुभग पातर विषै धारि थुति गायजी ॥
जगत तप तासु फल तुरत नाशै सही ।
जानि इमि धर्म दशधा जजौं शिवमही ॥२॥

ॐ ह्रीं श्री दशलक्षणधर्मेभ्यः संसारतापविनाशनाय चन्दनं निर्वपामीति
स्वाहा ।

लेइ अक्षत भले मुक्तिफल से कहे ।

ऊजले अखण्ड सुभग स्वर्ण पातर लहे ॥

अखयपद पावनै आप मनमें सही ।

जानि इमि धर्म दशधा जजौं शिवमही ॥३॥

ॐ ह्रीं श्री दशलक्षणधर्मेभ्योऽक्षयपदप्राप्तयेऽक्षतान् निर्वपामीति
स्वाहा ।

फूल कञ्चनवरन कलपतरुके भले ।

गंध जुत रंग शुभ लेइ निज कर चले ॥

माल तिन गूथि कामबाण नाशक सही ।

जानि इमि धर्म दशधा जजौं शिवमही ॥४॥

ॐ ह्रीं श्री दशलक्षणधर्मेभ्यः कामबाणविध्वंशनाय पुष्पं निर्वपामीति
स्वाहा ।

सुगम नैवेद्य मोदक घने लाइये ।

विविध स्वादमय सु धरि भक्ति उर भाइये ॥

भूख-दुखहर्ण स्वर्ण-पात्र धरिके सही ।

जानि इमि धर्म दशधा जजौं शिवमही ॥५॥

ॐ ह्रीं श्री दशलक्षणधर्मेभ्यः क्षुधारोगविनाशनाय नैवेद्यं निर्वपामीति
स्वाहा ।

दीप मणि रतनमय और घृतमय सही ।

धारि कनक थालमें सु आरति जु करि लही ॥

धर्मज्योति मोह अंधकार नाशिका सही ।

जानि इमि धर्म दशधा जजौं शिवमही ॥६॥

ॐ ह्रीं श्री दशलक्षणधर्मेभ्यो मोहान्धकारविनाशनाय दीपं निर्वपामीति
स्वाहा ।

धूप दश अंग मय लायकर सारजी ।
अगनि संग खेवहूँ सुभक्ति उर धारजी ।
कर्म छयकार भव वास नाशन सही ।
जानि इमि धर्म दशधा जजौं शिवमही ॥७॥

ॐ ह्रीं श्री दशलक्षणधर्मेभ्यो दुष्टाष्टकर्मदहनाय धूपं निर्वपामीति
स्वाहा ।

लौंग खारिक सुनारिकेल सुक्खकारजी ।
और बादाम पुंगी फलादि सार जी ॥
लेई निज हाथ में सुभक्ति धरिके सही ।
जानि इमि धर्म दशधा जजौं शिवमही ॥८॥

ॐ ह्रीं श्री दशलक्षणधर्मेभ्यः मोक्षफलप्राप्तये फलं निर्वपामीति
स्वाहा ।

नीर गंध अक्षत सु फूल चरु सोई जी ।
दीप अरु धूप फल अरघ संजोइ जी ॥
पुरट थाली विषैं भक्ति करिके सही ।
जानि इमि धर्म दशधा जजौं शिवमही ॥९॥

ॐ ह्रीं श्री दशलक्षणधर्मेभ्यःऽनर्घपदप्राप्तयेऽर्घ्यं निर्वपामीति स्वाहा ।

धर्म भवकूप तैं काढ़ने को रसी ।
भव उदधि पार करतार नवका इसी ॥

धर्म सुख दैन जिमि तात माता सही ।

जानि इमि धर्म दशधा जजौं शिवमही ॥१०॥

ॐ ह्रीं श्री दशलक्षणधर्मेभ्यः महार्घं निर्वपामीति स्वाहा ।

अथ जयमाला

(दोहा)

दश वृष रतन मिलायके, माल करै भवि जोय ।

धरै आपने उर विषैं, ता सम अवर न कोय ॥१॥

(वेसरी छन्द)

दशलक्षण वृष शिवमग दीवा, धर्म थकी सुख पावै जीवा ।

मुक्ति दीप पहुँचावन जावा, ये दश धर्म जजौं जुत भावा ॥२॥

दशविधि धरम धरै जो कोई, करम नाशि फिरि दुख नहिं होई ।

धरम जु साधन और न कोई, यों दश धर्म जजौं मद खोई ॥३॥

धरम जीव का पालनहारा, धर्म मान का खण्डन वारा ।

धर्म थकी जावै कुटिलाई, इमि दश धर्म जजौं चितलाई ॥४॥

सांच वचन सम धरम न जानौ, धर्म भाव निर्मल पहिचानौ ।

धर्म जीव रख इन्द्रिय जीतं, इमि दश धर्म जजौं करि प्रीतं ॥५॥

तप ही सर्व धर्मका मूला, त्याग धरमतैं क्षय अघ थूला ।

धर्म नगन सम और न कोई, इनि दश धर्म जजौं मद कोई ॥६॥

नारी त्याग धरम शिवदाई, ये दश धरम जगतमें भाई ।

जो दशलक्षण मनमें आनै, सो भव तप हरि शिवपद ठानै ॥७॥

दशलक्षण व्रत इण विधि कीजै, उत्कृष्टै दश वास करीजै ।
 नातर बेले पारन भाई, तथा इकंतर वास कराई ॥८॥
 शक्तिहीन ह्वै तो सुन मीता, दश एकंत करौ धरि प्रीता ।
 व्रत दश वरस करै मन लाई, करु उद्यापन मन वच काई ॥९॥
 नहिं उद्यापन शक्ति तुम्हारी, तौ दूनौ व्रत करु सुखकारी ।
 पीछे यथाशक्ति खरचावै, पूजन धर्म उद्योत करावै ॥१०॥

(दोहा)

इत्यादिक विधि सहित जो, धर्म करै दश सार ।
 पावै सुख मन भावनो, अनुक्रम ले भव पार ॥११॥

ॐ ह्रीं श्री दशलक्षणधर्मैभ्यः पूर्णार्घ्यं निर्वपामीति स्वाहा ।

॥ इति समुच्चय पूजा ॥



उत्तम क्षमा धर्म पूजा

(अडिल्ल)

जीव तिरस थावर जेते जगमें सही ।
 देव नरक नर पशू चारि गति की मही ॥
 तिन सब ऊपर दयाभाव उरमाहिं जी ।
 सो है उत्तम क्षमा, थापि जजुं याहिं जी ॥१॥

ॐ ह्रीं श्री उत्तमक्षमाधर्मांग ! अत्र अवतर अवतर संवौषट् ।

ॐ ह्रीं श्री उत्तमक्षमाधर्मांग ! अत्र तिष्ठ तिष्ठ ठः ठः ।

ॐ ह्रीं श्री उत्तमक्षमाधर्मांग ! अत्र मम सतिहितो भव भव वषट् ।

अथाष्टकम्

(पद्धड़ी छन्द)

जल गंग नदी को विमल सोड़, धरि रतन पयाले शुद्ध होड़ ।
यह धरम छिमा उत्तम सुजान, मैं पूजों मनवच भक्ति आन ॥१॥

ॐ ह्रीं श्री उत्तमक्षमाधर्मागाय जन्मजरामृत्युविनाशनाय जलं ।

बावन चन्दन घसि नीर लाय, धरि कनक रकेबी जिन चढ़ाय ।
यह धरम छिमा उत्तम सुजान, मैं पूजों मनवच भक्ति आन ॥२॥

ॐ ह्रीं श्री उत्तमक्षमाधर्मागाय संसारतापविनाशनाय चन्दनं ।

अक्षतमुक्ताफलसमजुलाय, अतिउज्ज्वलनखशिखशुद्धभाय ।
यह धरम छिमा उत्तम सुजान, मैं पूजों मनवच भक्ति आन ॥३॥

ॐ ह्रीं श्री उत्तमक्षमाधर्मागाय अक्षयपदप्राप्तये अक्षतान् ।

शुभ फूल कलपतरुके अनूप, करि माला सुभग सुगंध रूप ।
यह धरम छिमा उत्तम सुजान, मैं पूजों मनवच भक्ति आन ॥४॥

ॐ ह्रीं श्री उत्तमक्षमाधर्मागाय कामबाणविध्वंसनाय पुष्पं ।

नाना रस पूरित चरु सम्हार, शुभ मोदक आदि अनेक धार ।
यह धरम छिमा उत्तम सुजान, मैं पूजों मनवच भक्ति आन ॥५॥

ॐ ह्रीं श्री उत्तमक्षमाधर्मागाय क्षुधारोगविनाशनाय नैवेद्यं ।

मणिदीपकसारबनाय लाय, धरि कनक थाल भरि भक्ति भाय ।
यह धरम छिमा उत्तम सुजान, मैं पूजों मनवच भक्ति आन ॥६॥

ॐ ह्रीं श्री उत्तमक्षमाधर्मागाय मोहान्धकारविनाशनाय दीपं ।

ले धूप अगरुजा गंधकार, दुर्भाव हुताशन मांहि जार ।
यह धरम छिमा उत्तम सुजान, मैं पूजों मनवच भक्ति आन ॥७॥

ॐ ह्रीं श्री उत्तमक्षमाधर्मांगाय दुष्टाष्टकर्मदहनाय धूपं ।

फल नारिकेल बादाम सोइ, पुंगीफल खारक भक्ति जोइ ।
यह धरम छिमा उत्तम सुजान, मैं पूजों मनवच भक्ति आन ॥८॥

ॐ ह्रीं श्री उत्तमक्षमाधर्मांगाय मोक्षफलप्राप्तये फलं ।

जल चन्दन अक्षत फूल लाय, चरु दीप धूप फल अरघ भाय ।
यह धरम छिमा उत्तम सुजान, मैं पूजों मनवच भक्ति आन ॥९॥

ॐ ह्रीं श्री उत्तमक्षमाधर्मांगाय अनर्घ्यपदप्राप्तये अर्घं ।

अथ प्रत्येकार्घ्याणि

(अडिल्ल)

पाप प्रकृति कर जीव अशुभ बंधन कर्यो ।

थावर नामा कर्म उदय दुखको भर्यो ॥

पृथ्वी माहिं सु जाय सहै बहु अघ भला ।

तिन का रक्षण-भाव छमा उत्तम भला ॥१॥

ॐ ह्रीं श्री पृथिवीकायिकपरिरक्षणरूपोत्तमक्षमाधर्मांगाय अर्घं ।

जे जलकायिक जीव ज्ञान विन दुख लहैं ।

इक इन्द्रियके द्वार अतुल विपदा सहैं ॥

तिनको दुखमय जानि मुनी करुणा करैं ॥

तसु प्रसादतैं झटिति मोक्ष-वनिता वरें ॥२॥

ॐ ह्रीं श्री जलकायिकपरिरक्षणरूपोत्तमक्षमाधर्मांगाय अर्घं निर्व० ।

अग्निकाय धर जीव एक इन्द्रिय सही ।

नाना दुख तन सहैं जलैं सब जग मही ॥

इन पर करुणाभाव धरैं जे भवि सही ।

सो ही उत्तम क्षमा मोक्षदाता कही ॥३॥

ॐ ह्रीं श्री अग्निकायिकपरिरक्षणरूपोत्तमक्षमाधर्मांगाय अर्घ ।

पवन कायके जीव महा संकट सहैं ।

हाथ पांव मुख वचन थकी बाधा लहैं ॥

इन पर करुणाभाव जती धारैं सही ।

सो ही उत्तम क्षमा कही शिव की मही ॥४॥

ॐ ह्रीं श्री वायुकायिकपरिरक्षणरूपोत्तमक्षमाधर्मांगाय अर्घ ।

हरित कायमें प्राणी अति वेदन लहै ।

छेदन भेदन कष्ट महा अघ फल सहै ॥

इन पर समताभाव सुखी इनको चहै ।

सो ही उत्तमक्षमा धारि मुनि शिव लहै ॥५॥

ॐ ह्रीं श्री वनस्पतिकायिकपरिरक्षणरूपोत्तमक्षमाधर्मांगाय अर्घ ।

थावरके पन भेद पाप फलतैं बने ।

सूक्ष्म बादर भेद दोय यों जिन भने ॥

इनको दुखमय जानि दया मन लाय हैं ।

सो ही उत्तम छमा जजौं शिरनाय हैं ॥६॥

ॐ ह्रीं श्री सूक्ष्मस्थूलपंचस्थावरपरिरक्षणरूपोत्तमक्षमाधर्मांगाय अर्घ ।

लट अरु जोंक गिंडोला इल्ली जानिये ।

कौड़ी शंख दुइन्द्रिय अति दुख थानिये ॥

इन पर करुणाभाव जती धारैं सही ।

सो ही उत्तम छमा जजौं शिव की मही ॥७॥

ॐ ह्रीं श्री द्वीन्द्रियजीवपरिरक्षणरूपोत्तमक्षमाधर्मागाय अर्घ ।

चींटी कुंथा खटमल वीछू दुख मही ।

तेइन्द्रिय परजाय पई घुण आदि ही ॥

इनको दुखमय जानि मुनी करुणा धरैं ।

सो ही उत्तम छमा जजौं सब अघ जरैं ॥८॥

ॐ ह्रीं श्री त्रीन्द्रियजीवपरिरक्षणरूपोत्तमक्षमाधर्मागाय अर्घ ।

माखी मच्छड़ टीड़ी भंवरादिक सही ।

बर ततइया मकड़ी चतुरान्द्रिय कही ॥

इनको दुखिया देखि मुनी करुणा धरैं ।

सो ही उत्तम छमा जजौं वसुविधि जरैं ॥९॥

ॐ ह्रीं श्री चतुरिन्द्रियजीवपरिरक्षणरूपोत्तमक्षमाधर्मागाय अर्घ ।

इन्द्रिय पांचों होय नहीं मन जो लहैं ।

ते जिय जानि असैनी अघफल अति दहैं ॥

इनको दुख भरिपूर जानि करुणा धरै ।

सो ही उत्तम छमा जजौं शिवथल धरै ॥१०॥

ॐ ह्रीं असंज्ञीपंचेन्द्रियजीवपरिरक्षणरूपोत्तमक्षमाधर्मागाय अर्घ ।

नरक जीव अति दुखी पापफलतैं सही ।

छेदन भेदन पीर सहैं जाति ना कही ॥

इन पर करुणाभाव जती अति लाय हैं ।

सो ही उत्तम छमा जजौं सुखदाय हैं ॥११॥

ॐ ह्रीं नारकीजीवपरिरक्षणरूपोत्तमक्षमाधर्मागाय अर्घ ।

(गीता छन्द)

मनुष क्रोध रु मान माया, लोभवश दुखिया घने ।
 बहु चाह पीड़ित रागद्वेषी, अघ घनो उपजे तिने ॥
 तिन देख यतिवरद या लावैं, महा दीनदयाल जी ।
 सो धर्म उत्तम छमा निर्मल जजौं, भाग्य विशाल जी ॥१२॥

ॐ ह्रीं मनुष्यजीवपरिरक्षणरूपोत्तमक्षमाधर्मांगाय अर्घ ।

परकार चारों देव गतिमें, जीव सुख राचै सही ।
 लछि देखि परकी झुरै नित ही, मानते पीड़ा कही ॥
 तिन देखि मुनि उर दया भावै, महा कोमल भावजी ।
 सो धर्म उत्तम क्षमा पूजों, अर्घतैं कर चावजी ॥१३॥

ॐ ह्रीं चतुर्विधदेवजीवपरिरक्षणरूपोत्तमक्षमाधर्मांगाय अर्घ ।

(चौपाई)

थावर तिरस जीव सब जोई, चहुंगति करमनि के वशि होई ।
 तिनको देखि दया उर लाई, सो उत्तम खम धर्म जजाई ॥१४॥

ॐ ह्रीं त्रसस्थावरसमस्तजीवपरिरक्षणरूपोत्तमक्षमाधर्मांगाय अर्घ ।

जयमाला

(दोहा)

धर्म क्षमा उत्तम बड़ो, सब जीवन सुखदाय ।
 जजैं जीव सो पुनि लहै, करै जु शिवपुर जाय ॥१॥

(वेसरी छन्द)

सब जीवनमें राग न दोषा, सो है क्षमा धरम निरदोषा ।
 दुर्जन कृत उपसर्ग लहावै, ताहू पै समभाव रहावै ॥२॥

मुनिको वचन कहै दुखकारी, मरम छेद छेदै अघ धारी ।
 मान खण्ड किरिया करवावै, तब मुनि क्षमा धर्म मन लावै ॥३॥
 जो कोई दुष्ट मुनिनको मारै, तीक्ष्ण शस्त्र तैं करि परिहारै ।
 बांधैं तनको खेद न पावै, तिन पर क्षमा धर्म मन लावै ॥४॥
 अति दुखिया जियको ऋषि जानै, तब मुनि अनुकम्पा मन आनै ।
 आपा परको हित उपजावै, तब मुनि क्षमा धरम मन लावै ॥५॥
 उत्तम क्षमा धरम सुखदाई, क्षमा धरम सब जियका भाई ।
 जब मुनि हू पै कष्ट जु आवै, तब मुनि क्षमा धर्म मन लावै ॥६॥
 क्षमा धरमसी ढाल न होई, क्रोध समान प्रहार न कोई ।
 क्षमा समान न बल अति पावै, तातें जती क्षमा वृष भावै ॥७॥
 क्षमा धरम शिव राह बताई, क्षमा तात माता अरु भाई ।
 जातै सिद्ध सुखनको पावै, ऐसी क्षमा मुनी मन लावै ॥८॥

(सोरठा)

क्षमा आभूषण सार, उरमें जो पहिरे सही ।
 ते भवसागर पार, जजौं धर्म उत्तम क्षमा ॥९॥

ॐ ह्रीं श्री उत्तमक्षमाधर्मांगाय पूर्णार्घ्य ।

॥ इति उत्तमक्षमा धर्म पूजा ॥



दशलक्षण धर्म पूजन

(पं. दानतरायजी कृत)

(अनुष्टुप) स्थापना (संस्कृत)

उत्तमक्षान्तिकाद्यन्त-ब्रह्मचर्य-सुलक्षणम् ।

स्थापय दशधा धर्ममुत्तमं जिनभाषितम् ॥

(अडिल्ल) स्थापना (हिन्दी)

उत्तम क्षमा मारदव आरजव भाव हैं,

सत्य शौच संयम तप त्याग उपाव हैं ।

आकिंचन ब्रह्मचर्य धरम दश सार हैं,

चहुँगति-दुखतैं काढ़ि मुकति करतार हैं ॥

ॐ ह्रीं श्री उत्तमक्षमादिदशलक्षणधर्म ! अत्र अवतर अवतर संवौषट् इति आह्वाननम् ।

ॐ ह्रीं श्री उत्तमक्षमादिदशलक्षणधर्म ! अत्र तिष्ठ तिष्ठ ठःठः स्थापनम् ।

ॐ ह्रीं श्री उत्तमक्षमादिदशलक्षणधर्म ! अत्र मम सन्निहितो भव भव वषट् सन्निधिकरणम् ।

(सोरठा)

हेमाचल की धार, मुनि-चित सम शीतल सुरभि ।

भव-आताप निवार, दस-लच्छन पूजौं सदा ॥

ॐ ह्रीं श्री उत्तमक्षमामार्दवार्जवशौचसत्यसंयमतपस्त्यागाकिंचन्यब्रह्मचर्येति

दशलक्षणधर्माय जन्म-जरा-मृत्युविनाशनाय जलं निर्वपामीति स्वाहा ।

चन्दन केशर गार, होय सुवास दशों दिशा ।

भव-आताप निवार, दस-लच्छन पूजौं सदा ॥

ॐ ह्रीं श्री उत्तमक्षमादिदशलक्षणधर्माय संसारतापविनाशनाय चंदनं नि. स्वाहा ।

अमल अखण्डित सार, तन्दुल चन्द्र समान शुभ ।

भव-आताप निवार, दस-लच्छन पूजौं सदा ॥

ॐ ह्रीं श्री उत्तमक्षमादिदशलक्षणधर्माय अक्षयपदप्राप्तये अक्षतान् नि. स्वाहा ।

फूल अनेक प्रकार, महकें ऊरध-लोकलों ।

भव-आताप निवार, दस-लच्छन पूजौं सदा ॥

ॐ ह्रीं श्री उत्तमक्षमादिदशलक्षणधर्माय कामबाणविनाशनाय पुष्पं नि. स्वाहा ।

नेवज विविध निहार, उत्तम षट्-रस-संजुगत ।

भव-आताप निवार, दस-लच्छन पूजौं सदा ॥

ॐ ह्रीं श्री उत्तमक्षमादिदशलक्षणधर्माय क्षुधारोगविनाशनाय नैवेद्यं नि. स्वाहा ।

बाति कपूर सुधार, दीपक-ज्योति सुहावनी ।
 भव-आताप निवार, दस-लच्छन पूजौ सदा ॥
 ॐ ह्रीं श्री उत्तमक्षमादिदशलक्षणधर्माय मोहान्धकारविनाशनाय दीपं नि. स्वाहा ।
 अगर धूप विस्तार, फैले सर्व सुगन्धता ।
 भव-आताप निवार, दस-लच्छन पूजौ सदा ॥
 ॐ ह्रीं श्री उत्तमक्षमादिदशलक्षणधर्माय अष्टकर्मदहनाय धूपं नि. स्वाहा ।
 फल की जाति अपार, घ्रान-नयन-मन-मोहने ।
 भव-आताप निवार, दस-लच्छन पूजौ सदा ॥
 ॐ ह्रीं श्री उत्तमक्षमादिदशलक्षणधर्माय मोक्षफलप्राप्तये फलं नि. स्वाहा ।
 आठों दरब सँवार, 'द्यानत' अधिक उछाहसौं ।
 भव-आताप निवार, दस-लच्छन पूजौ सदा ॥
 ॐ ह्रीं श्री उत्तमक्षमादिदशलक्षणधर्माय अनर्घ्यपदप्राप्तये अर्घ्यं नि. स्वाहा ।

अंग-अर्घ्य

(सोरठा)

पीड़ें दुष्ट अनेक, बाँध मार बहुविधि करें ।
 धरिये छिमा विवेक, कोप न कीजै पीतमा ॥
 उत्तम छिमा गहो रे भाई, इह-भव जस, पर भव सुखदाई ।
 गाली सुनि मन खेद न आनो, गुन को औगुन कहै अयानो ॥
 कहि है अयानो वस्तु छिनै, बाँध मार बहुविधि करै ।
 घर तैं निकारै तन विदारै, वैर जो न तहाँ धरै ॥
 ते करम पूरब किये खोटे, सहै क्यों नहिं जीयरा ।
 अति क्रोध-अगनि बुझाय प्रानी, साम्य-जल ले सीयरा ॥
 ॐ ह्रीं श्री उत्तमक्षमाधर्माङ्गाय अर्घ्यं निर्वपामीति स्वाहा ।
 मान महाविषरूप, करहि नीच-गति जगत में ।
 कोमल सुधा अनूप, सुख पावै प्रानी सदा ॥
 उत्तम मार्दव गुन मन-माना, मान करन को कौन ठिकाना ।
 बस्यो निगोद माहिं तैं आया, दमरी रूँकन भाग बिकाया ॥

रूकन बिकाया भाग वशतैं, देव इक-इन्द्री भया ।
उत्तम मुआ चाण्डाल हूवा, भूप कीड़ों में गया ॥
जीतव्य जोवन धन गुमान, कहा करै जल-बुदबुदा ।
करि विनय बहु-गुन बड़े जन की, ज्ञान का पावै उदा ॥

ॐ ह्रीं श्री उत्तममार्दवधर्माङ्गाय अर्घ्यं निर्वपामीति स्वाहा ।

कपट न कीजै कोय, चोरन के पुर ना बसै ।

सरल सुभावी होय, ताके घर बहु-सम्पदा ॥

उत्तम आर्जव रीति बखानी, रंचक दगा बहुत दुखदानी ।
मन में होय सो वचन उचरिये, वचन होय सो तन सौं करिये ॥
करिये सरल तिहुँ जोग अपने देख निरमल आरसी ।
मुख करै जैसा लखै तैसा, कपट-प्रीति अँगार-सी ॥
नहिं लहै लछमी अधिक छल करि, करम-बन्ध विशेषता ।
भय त्यागि दूध बिलाव पीवै, आपदा नहिं देखता ॥

ॐ ह्रीं श्री उत्तम-आर्जवधर्माङ्गाय अर्घ्यं निर्वपामीति स्वाहा ।

धरि हिरदै सन्तोष, करहु तपस्या देह सों ।

शौच सदा निर्दोष, धरम बड़ो संसार में ॥

उत्तम शौच सर्व जग जाना, लोभ पाप को बाप बखाना ।
आशा-पास महा दुखदानी, सुख पावै सन्तोषी प्रानी ॥
प्रानी सदा शुचि शील जप तप, ज्ञान ध्यान प्रभावतैं ।
नित गंग जमुन समुद्र न्हाये, अशुचि-दोष सुभावतैं ॥
ऊपर अमल मल भ्रूयो भीतर, कौन विधि घट शुचि कहै ।
बहु देह मैली सुगुन-थैली, शौच-गुन साधू लहै ॥

ॐ ह्रीं श्री उत्तमशौचधर्माङ्गाय अर्घ्यं निर्वपामीति स्वाहा ।

कठिन वचन मति बोल, पर-निन्दा अरु झूठ तज ।

साँच जवाहर खोल, सतवादी जग में सुखी ॥

उत्तम सत्य-बरत पालीजै, पर-विश्वासघात नहिं कीजै ।
साँचे-झूठे मानुष देखो, आपन पूत स्वपास न पेखो ॥
पेखो तिहायत पुरुष साँचे को दरब सब दीजिये ।
मुनिराज-श्रावक की प्रतिष्ठा, साँच गुण लख लीजिये ॥

ऊँचे सिंहासन बैठि वसु नृप, धरम का भूपति भया ।
वच झूठ सेती नरक पहुँचा, सुरग में नारद गया ॥

ॐ ह्रीं श्री उत्तमसत्यधर्माङ्गाय अर्घ्यं निर्वपामीति स्वाहा ।

काय छहों प्रतिपाल, पंचेन्द्रिय मन वश करो ।

संजम-रतन सँभाल, विषय-चोर बहु फिरत हैं ॥

उत्तम संजम गहु मन मेरे, भव-भव के भाजैं अघ तेरे ।

सुरग-नरक-पशुगति में नाहीं, आलस-हरन करन सुख ठाँ हीं ॥

ठाहीं पृथ्वीवी जल आग मारुत, रूख त्रस करुना धरो ।

सपरसन रसना घान नैना, कान मन सब वश करो ॥

जिस बिना नहीं जिनराज सीझे, तू रूल्यो जग-कीच में ।

इक घरी मत विसरो करो नित, आयु जम-मुख बीच में ॥

ॐ ह्रीं श्री उत्तमसंयमधर्माङ्गाय अर्घ्यं निर्वपामीति स्वाहा ।

तप चाहैं सुरराय, करम-शिखर को वज्र है ।

द्वादशविधि सुखदाय, क्यों न करै निज सकतिसम ॥

उत्तम तप सब माहिं बखाना, करम-शैल को वज्र-समाना ।

बस्यो अनादि निगोद मँझारा, भू विकलत्रय पशु तन धारा ॥

धारा मनुष तन महादुर्लभ, सुकुल आयु निरोगता ।

श्रीजैनवानी तत्त्वज्ञानी, भई विषय-पयोगता ॥

अति महा दुरलभ त्याग विषय-कषाय जो तप आदरैं ।

नर-भव अनूपम कनक घर पर, मणिमयी कलसा धरैं ॥

ॐ ह्रीं श्री उत्तमतपोधर्माङ्गाय अर्घ्यं निर्वपामीति स्वाहा ।

दान चार परकार, चार संघ को दीजिए ।

धन बिजुली उनहार, नर-भव लाहो लीजिए ॥

उत्तम त्याग कह्यो जग सारा, औषध शास्त्र अभय आहारा ।

निहचै राग-द्वेष निरवारै, ज्ञाता दोनों दान सँभारै ॥

दोनों सँभारै कूप-जल सम, दरब घर में परिनया ।

निज हाथ दीजे साथ लीजे, खाय खोया बह गया ॥

धनि साध शास्त्र अभय दिवैया, त्याग राग विरोध को ।
बिन दान श्रावक साधु दोनों, लहैं नाहीं बोध को ॥

ॐ ह्रीं श्री उत्तमत्यागधर्माङ्गाय अर्घ्यं निर्वपामीति स्वाहा ।

परिग्रह चौबिस भेद, त्याग करैं मुनिराजजी ।

तिसना भाव उछेद, घटती जान घटाइए ॥

उत्तम आकिंचन गुण जानो, परिग्रह-चिन्ता दुख ही मानो ।

फाँस तनक-सी तन में सालै, चाह लँगोटी की दुख भालै ॥

भालै न समता सुख कभी नर, बिना मुनि-मुद्रा धरैं ।

धनि नगन पर तन-नगन ठाढ़े, सुर-असुर पायनि परैं ॥

घर माहिं तिसना जो घटावे, रुचि नहीं संसार सौं ।

बहु धन बुरा हू भला कहिये, लीन पर-उपगार सौं ॥

ॐ ह्रीं श्री उत्तमाकिंचन्यधर्माङ्गाय अर्घ्यं निर्वपामीति स्वाहा ।

शील-बाढ़ नौ राख, ब्रह्म-भाव अन्तर लखो ।

करि दोनों अभिलाख, करहु सफल नर-भव सदा ॥

उत्तम ब्रह्मचर्य मन आनौ, माता बहिन सुता पहिचानौ ।

सहैं बान-वरषा बहु सूरे, टिकै न नैन-बान लखि कूरे ॥

कूरे तिया के अशुचि तन में, काम-रोगी रति करैं ।

बहु मृतक सड़हिं मसान माहीं, काग ज्यों चोंचें भरैं ॥

संसार में विष-बेल नारी, तजि गये जोगीश्वरा ।

‘द्यानत’ धरम दश पैड़ि चढ़ि कै, शिव-महल में पग धरा ।

ॐ ह्रीं श्री उत्तमब्रह्मचर्यधर्माङ्गाय अर्घ्यं निर्वपामीति स्वाहा ।

समुच्चय जयमाला

(दोहा)

दश लच्छन वन्दौ सदा, मनवांछित फलदाय ।

कहों आरती भारती, हम पर होहु सहाय ॥

(चौपाई)

उत्तम छिमा जहाँ मन होई, अन्तर-बाहिर शत्रु न कोई ।
उत्तम मार्दव विनय प्रकासे, नाना भेद ज्ञान सब भासे ॥
उत्तम आर्जव कपट मिटावे, दुरगति त्यागि सुगति उपजावे ।
उत्तम शौच लोभ-परिहारी, सन्तोषी गुण-रतन भण्डारी ॥
उत्तम सत्य-वचन मुख बोले, सो प्रानी संसार न डोले ।
उत्तम संजम पाले ज्ञाता, नर-भव सफल करै, ले साता ॥
उत्तम तप निरवांछित पाले, सो नर करम-शत्रु को टाले ।
उत्तम त्याग करे जो कोई, भोगभूमि-सुर-शिवसुख होई ॥
उत्तम आकिंचन व्रत धारे, परम समाधि दशा विसतारे ।
उत्तम ब्रह्मचर्य मन लावे, नर-सुर सहित मुक्ति-फल पावे ॥
ॐ ह्रीं श्री उत्तमक्षमामार्दवार्जवशौचसत्यसंयमतपस्त्यागाकिंचन्यब्रह्मचर्येति
दशलक्षणधर्माय जयमालापूर्णार्घ्यं निर्वपामीति स्वाहा ।

(दोहा)

करै करम की निरजरा, भव पीजरा विनाशि ।
अजर अमर पद को लहैं, 'द्यानत' सुख की राशि ॥
(पुष्पाञ्जलिं क्षिपेत्)

देखो जी आदीश्वर स्वामी, कैसा ध्यान लगाया है ।
कर ऊपर कर सुभग विराजै, आसन थिर ठहराया है ॥टेक॥
जगत विभूति भूति सम तजकर, निजानन्द पद ध्याया है ।
सुरभित श्वासा आशा वासा, नासा दृष्टि सुहाया है ॥१॥
कंचन वरन चले मन रंच न सुर-गिरि ज्यों थिर थाया है ।
जास पास अहि मोर मृगी हरि, जाति विरोध नशाया है ॥२॥
शुध-उपयोग हुताशन में जिन, वसुविधि समिध जलाया है ।
श्यामलि अलकावलि सिर सोहे, मानो धुआँ उड़ाया है ॥३॥
जीवन-मरन अलाभ-लाभ जिन सबको नाश बताया है ।
सुर नर नाग नमहिं पद जाके "दौल" तास जस गाया है ॥४॥